

ծարանը և նրանից հետո՝ Հայաստանում աղապիսին գոյութուն ունեցել է, թէ ոչ:

Անկախ այն բանից, որ մեր ձեռքի տակ դեռ ևս փաստեր չկան, պիտի ենթադրել, որ անցյալում նույնպես, թղթի մըշակման արհեստանոցներ գոյութուն ունեցել են: Թղթի վրա գրված Հայկական հին ձեռագրերի այն հսկայական քանակութիւնը, որն ունենք այժմ, խոսում է հոգուտ այս ենթադրութեան:

Թղթի վրա եղած ձեռագրերից ամենահինը որ գտնվում է Մատենադարանում, դա 10-րդ դարի (971) մի պատմական ժամանակագրական ժողովածու է, գրված 358 թերթի վրա, միջին մեծությամբ գրչութեամբ Պետական ձեռագրատան (Մատենադարանի) ձեռագիր № 2679 (102): Թուղթը՝ ինչպես նաև ձեռագրերի մեծ մասի թղթերը, չունեն իրենց վրա ոչ մի գրոշմ, որից կարելի լիներ պարզել թէ որտեղ է այն արտադրվել:

Ինչ վերաբերում է հետագային (այսինքն՝ Սիմեոնի կառուցած գործարանից հետո ընկած ժամանակին), կարող ենք ասել, որ Հայաստանում այլևս թղթի գործարան չի հիմնվել: Սակայն արվել է մի փորձ՝ աղապիսին հիմնադրելու: Այդ փորձը, որ կատարվել է Սահակ ծաղկարար եպիսկոպոսի կողմից՝ իր տեսակի մեջ մեծ հետաքրքրութիւն է ներկայացնում. ահա մի քանի տեղեկութիւններ այդ մասին:

1837 թ. ծաղկարար Սահակ եպիսկոպոսը խնդրագրեր է ուղղում Էջմիածնի սինոդին, նոր թղթագործարան, նկարչական ներկերի, կաղմարարական ու այլ անհրաժեշտ նյութերի (պատաշ, նիշաշտա, ժանգառ, լաջվարդ, զրմզի և այլն) արհեստանոց կազմակերպելու համար, (տես ՀՍՍՌ ժողկոմսովետին կից Պետական Ձեռագրատան արխիվային բաժին, Սինոդի անտեսական մասի 1837 թ. նո 9 գործը): Սահակի առաջին խնդրագրի առթիվ Սինոդը իր նույն թղթի մարտի 1-ի¹ նիստում որոշում է. «հրամանագրել Սահակայ եպիսկոպոսին, զինառ այժմ թողեալ դմեքնայն իւր (թղթաշինութեան) յայտնեացէ Սինոդոսին, թէ առաջին անգամ որքան դրամք հարկաւո-

րին նմայ՝ առ ի յառաջ ածել զերիս խոտապցեալ ի նմանէ նիւթս պատաշի, նաշիշտի և ժանգառի. և այնքան դրամով որքան կարող է պատրաստել զայնպիսիս, զի Սինոդոս կարացէ յիւրում ժամանակի տընօրինել ըստ այսմ մասին զարժանն» (Նույն տեղ. թերթ 2):

Այսպիսով թղթագործարանի կառուցման խնդիրը մերժվում է:

Երկրորդ և երրորդ խնդրագրերի քնննութիւնից հետո, որ տեղի է ունենում սինոդի 1837 հուլիսի 16-ի նիստում, որոշվում է լուսարար Բարսեղ եպիսկոպոսին հանձնարարել անհրաժեշտ նյութերը և համապատասխան քանակութեամբ դրամը արձանագրել ծաղկարարին և ապա նրան հանձնարարել Ալիքուշակցի Զաքարիային, որը Սահակին տանելու է պղնձահանքը՝ նկարչական ներկերի արտադրութեան համար անհրաժեշտ հանքը որոնելու:

Ութն ամիս անցնելուց հետո, 1838 թ. մարտի 11-ին, Սինոդը նույն խնդրի մասին որոշում է. քանի որ մինչ այդ Սահակ եպիսկոպոսը և լուսարար Բարսեղը գործի հետագա ընթացքի մասին տեղեկութիւններ չեն տվել «որք զուցե իսպառ ոչ մատուցեն Սինոդոսին ի պատճառս անկատար թողելոյ Սահակայ եպիսկոպոսին զայն առաջարկութիւն իւր, ըստ ինչ-ինչ անակնուրինի զիպուածոյ, զգործն՝ որ ի Սինոդոսին աստ ի մասինս այսմիկ, աւարտեալ համարել յիւրում ժամանակի տալ ի դիւանն վասն պահպանութեան» (Նույն տեղ թերթ 18):

Հետագա մի օրագրից (1838 թ. ապրիլի 22) պարզվում է, որ ներկեր պատրաստելու համար Սինոդի պահանջմամբ պղնձաքար է ուղարկվել Ելիսավետոպոլից՝ Հարութիւն վարդապետի կողմից և հանձնվել է Սահակ եպիսկոպոսին, որն օգտագործելով այն, պատրաստի նյութը հանձնել է աղաքանի վերատեսչին:

Ստանալով ծաղկարարի վերջին հայտարարութիւնը՝ Սինոդը բավարարվում է միայն նրանով, որ ծախսված գումարի դիմաց որոշ արդյունք ստացվել է և չի մըտահոգվել գործը հետագայում առաջ տանելու և զարգացնելու համար: